




REPUBLIKA E KOSOVËS  
REPUBLIKA KOSOVA - REPUBLIC OF KOSOVA  
KOMISIONI I PAVARUR I MEDIAVE  
NEZAVISNA KOMISIJA ZA MEDIJE  
INDEPENDENT MEDIA COMMISSION

Kanal 10  
Arben Ahmeti  
Drejtor  
Prishtinë



VENDIM

**Lidhur me Rastin Nr. 2021/308 – Komisioni i Pavarur i Mediave (KPM) për  
Kanal 10 (Palë Përgjegjëse)**

Faktet

1. Komisioni i Pavarur i Mediave (KPM) ka miratuar Kodin e Etikës për Ofruesit e Shërbimeve Mediale në Republikën e Kosovë KKPM-2016/3, i cili ka hyrë në fuqi më 11 tetor 2016. Me Kodin e Etikës KKPM-2016/03 janë përcaktuar rregullat e sjelljes dhe të punës së shërbimeve mediale audiovizuale në pajtim me dispozitat ligjore që janë të domosdoshme në një shoqëri demokratike.
2. KPM me datën 18 shtator 2021 ka pranuar një Ankesë të parashtruar nga z. Kushtrim Brahimaj, ndaj emisionit “Prime Time” me titullin “Gara për Gjakovën” të transmetuar me datën 16 shtator 2021 në Kanal 10. Në Ankesën e parashtruar nga z. Brahimaj theksohet se: *“Kandidatja për kryetare të komunës së Gjakovës znj. Mimoza Kusari Lila ka përmendur kërkuesin duke deklaruar të thëna të pavërteta të cilat përbëjnë shpifje dhe atë me saktësisht: “Ai që aktualisht është udhëheqës i resurseve njerëzore e ka edhe të përcaktuar tarifën, edhe i ka të përcaktuara kriteret se kë e merr në punë, si e merr në punë, z. Gjini e din.”*
3. KPM me datën 19 tetor 2021, përmes një shkrese e ka njoftuar Palën përgjegjëse për Ankesën e pranuar nga Pala ankuese dhe ka kërkuar sqarim brenda tre (3) ditësh lidhur me pretendimet e Ankesës.
4. KPM ka gjetur se Pala përgjegjëse nuk ka ofruar përgjigje brenda afatit të paraparë ligjor.
5. KPM, ka analizuar Ankesën e Palës ankuese dhe bazuar në Raportin e monitorimit të datës 26 tetor 2021 ka konstatuar se Pala përgjegjëse nuk i ka ofruar Palës ankuese të drejtën e reagimit, duke vepruar kështu në kundërshtim me nenin 10 paragrafi 1 të Kodit të Etikës KKPM-2016/03.
6. KPM, pas të gjeturave nga Raporti i monitorimit, me datën 29 tetor 2021 i ka dërguar Palës përgjegjëse Njoftim për Shkelje me të cilin e ka njoftuar për shkeljet e bëra dhe i ka kërkuar që në afat brenda shtatë (7) ditëve, nga pranimi i shkresës t’i ofrojë të drejtën e reagimit Palës ankuese, siç përcaktohet me nenin 10 paragrafi 1 të Kodit të Etikës KKPM 2016/03.



7. Për të vërtetuar se Pala përgjegjëse i ka ofruar të drejtën e reagimit Palës ankuese, KPM ka bërë sërish monitorim dhe bazuar në Raportin e monitorimit të datës 8 nëntor 2021 ka gjetur se Pala përgjegjëse nuk e ka transmetuar reagimin e Palës ankuese, duke vepruar kështu në kundërshtim me nenin 10 paragrafi 1 të Kodit të Etikës KKPM-2016/03.

#### Analiza ligjore

8. Komisioni i KPM-së konstaton se Pala përgjegjëse është gjetur në shkelje të nenit 10 paragrafi 1, të Kodit të Etikës KKPM-2016/03.

Nenin 10, paragrafi 1 i Kodit të Etikës KKPM-2016/03 përcakton se:

*“Me qëllim të korrektesisë dhe paanshmërisë duhet të ofrohet mundësia që brenda shtatë (7) ditësh pas paraqitjes së ankesës së individit apo organizatës, të transmetohet reagimi përkatës në mediumin e njëjtë. Reagimi duhet të transmetohet në kohë dhe hapësirë të njëjtë.”*

9. KPM, bazuar në Raportin e monitorimit konstaton se Pala përgjegjëse edhe pas Njoftimit për shkelje ka vepruar në kundërshtim me nenin 10 paragrafi 1 të Kodit të Etikës KKPM-2016/03, pasi që nuk e ka transmetuar reagimin e Palës ankuese.
10. KPM duke u bazuar në faktet e lartpërmendura ka konstatuar se Pala përgjegjëse me mos transmetimin e reagimit të Palës Ankuese ka bërë shkelje të nenit 10, paragrafi 1, të Kodit të Etikës KKPM-2016/03.


#### Vendim

11. Pala përgjegjëse sanksionohet me Vërejtje në pajtim me nenin 30, paragrafi 1, të Ligjit të KPM-së, për shkelje të nenit 10, paragrafi 1, të Kodit të Etikës KKPM 2016/03 për Ofruesit e Shërbimeve Mediale në Republikën e Kosovës.

#### E drejta për Ankesë

12. Ankesat i parashtrohen Bordit për Ankesa brenda tridhjetë (30) ditësh nga pranimi i vendimit të KPM-së në pajtim me nenin 29, paragrafi 5, të Ligjit të KPM-së. Ankesa bëhet me shkrim dhe duhet të përcillet me dokumente ose dëshmi që mund të kërkohen nga Bordi i Ankesave në pajtim me nenin 42, paragrafi 2, të Ligjit të KPM-së.
13. Bordi për Ankesa do t'i merr parasysh vetëm ankesat e bazuara në informacione ligjërisht relevante të cilat nuk ishin të disponueshme në kohën e marrjes së vendimit të KPM-së, apo të bazuara në mundësi se ekzistonte gabim procedural dhe material i bërë nga ana e KPM-së gjatë marrjes së vendimit.

  
Xhevat LATIFI  
Kryetar

  
Datë